

Newspaper	BERITA HARIAN
Date	05/09/2017B

# PM rasmi dua Gelanggang Futsal Cruyff

BH - 5/9/2017 pg. 3

**Kuala Lumpur:** Datuk Seri Najib Razak semalam merasmikan Gelanggang Futsal Cruyff yang ketiga dan keempat di negara ini, bersempena sambutan Hari Hasanah di PPR Seri Semarak di sini.

Gelanggang Futsal Cruyff Seri Semarak di PPR Seri Semarak dan Gelanggang Futsal Cruyff Air Panas di PPR Kampung Baru Air Panas adalah hasil kerjasama antara Yayasan Hasanah dan Yayasan Johan Cruyff.

Perdana Menteri yang tiba jam 7 malam di PPR Seri Semarak di sini, menandatangani plak perasmian gelanggang futsal yang dinamakan sempena legenda bola sepak Belanda, Johan Cruyff.

Najib kemudian masuk ke gelanggang itu dan berbual bersama pemain futsal PPR Seri Semarak, sebelum menjanginkan gol menerusi sepakan penalti sebagai gimik pelancaran, sebelum meninggalkan majlis jam 7.25 malam.

Yang turut hadir, Pengarah Urusan Khazanah Nasional Berhad, Tan Sri Azman Mokhtar dan Ahli Parlimen Setiawangsa, Datuk Ahmad Fauzi Zahari.

## Peluang asah bakat

Program Gelanggang Futsal Cruyff yang dikendalikan Yayasan Johan Cruyff, bertujuan menyediakan peluang kepada kanak-kanak dan belia kurang berkemampuan mengasah bakat dalam sukan futsal.

Gelanggang Futsal Cruyff yang

pertama di Malaysia dibina di Kampung Melayu Majidee di Johor Bahru, Johor dan dirasmikan pada 2012, manakala yang kedua adalah di Brickfields, pada 2013.

Program Hari Hasanah di PPR Seri Semarak, diraikan lebih 4,000 penduduk menerusi pelbagai aktiviti seperti bengkel kesihatan, seni kanak-kanak, sesi animasi, eksperimen sains, persembahan muzik serta perkhidmatan kerajaan seperti khidmat nasihat peguam, kaunseling keluarga dan

ceramah kerjaya.

Sementara itu, Pengarah Urusan Yayasan Hasanah, Shahira Ahmed Bazari, berkata pihaknya mahu masyarakat melakukan apa saja kerja kebajikan pada Hari Hasanah, sama ada amalan kebajikan kecil atau besar kerana ia memberi impak besar.

"Kami juga berharap Hari Hasanah diterima oleh masyarakat dan disambut pada hari Sabtu ke tiga dalam bulan September setiap tahun," katanya.